

1. Mizoram State Planning Board chu an Chairman Pu Lalduhoma, Chief Minister hovin vawiin khan Chief Minister office-ah an thukhawm .
2. Lai Autonomous District Council ah Congress MDC 1 leh MNF MDC 12 ten an din United Legislature Party chuan sorkarna an siamtheih thu Larsap hnenah an thlen.
3. Lok Sabha inthlan thawh thumna atana campaign chu vawiin tlai khan a tawp a, Zirtawpniah vote thlak a ni ang
4. Israel Prime Minister Benjamin Netanyahu chuan Hamas nen inremna zawnga inbiak ni mahse Gaza chhim lama Rafah khawpui chu an run dawn tho tih a sawi.

<><><>

STATE PLANNING BOARD MEETING

Mizoram State Planning Board chu an Chairman Pu Lalduhoma, Chief Minister hovin vawiin khan Chief Minister office-ah an thukhawm a. Planning Board in hma a lo lak tawh te leh ruahmanna a siam te an thlirho.

Chief Minister chuan, Planning Board chu Mizoram hmasawna tur ruahmanna tha leh fel fai a awm theih nana ngaihtuahna sengtu a ni a. An zirchianna te, an thurawn te, ruahmanna te leh thahnemngaihna ten nasa takin ram hmasawna a tichak dawn a ni, a ti.

Vice Chairman Dr. Kenneth Chawngliana chuan an hmalak tawh chin te sawiin, member Prof. H. Lalramnghinglova chuan Zau Policy for Sustainable Agriculture (under Land Reform Policy) an duan chu a sawifiah a ni.

<><><>

CENTRAL YMA

Central YMA chuan Assam atanga ruihhlo lo lut thin ni a sawi te enfiahin nimin khan Kumpulan Sub - Committee te leh Cachar Young Muslim Association hruaitute nen an inkawm a. Assam atanga ruihhlo lo luh dan leh lo lut thin ni a hriatte sawihoin, tihtawp dan ruahmanna an siam a ni.

Central YMA Kumpulan Committee te hian Vairengte Police Check Gate a duty te kawmin Temporary ILP an pek chhuah dan te, hnamdang ILP neilo lut ru an awm thin dan te sawiho a ni bawk. Vairengte SDO (Civil) hnen atanga thu dawn danin nikum April thla atanga kumin March thla thlenga Temporary ILP pekchhuah zat chu 53,231 a nih thu tarlan a ni.

Kumpulan Committee te hian tukin dar 2 vel khan Kawnpui leh Khamrâng inkarah eirawngbawlna Gas tihchingpen lai nangchingin Gas bur engemaw zat leh an hmanrua te an man a ni.

<><><>

LADC

Thlathum dawn Lai Autonomous District Council a sorkar a kal mumal thei tawh loh hnuah vawiin khan Congress MDC 1 leh MNF MDC 12 ten an din United Legislature Party chuan sorkarna an siamtheih thu Larsap hnenah an thlen a,

Congress Member, Lungpher South bialtu MDC Pu C. Lalmuanthanga hovin sorkarna an siamtheih thu Larsap hnenah Caretaker Lawngtlai DC, Pu Cheemala Siva Gopal Reddy kaltlangin an thlen a ni.

Caretaker Lawngtlai DC chuan an thu thlen chu Governor hnenah a lo thlen nghal tur thu a lo hrilh a. Hemi hnu hian United Legislature Party te chuan LADC Chairman Pu VL Hmuaka hmuin sorkarna an siamtheih thu hi an thelut bawk a ni.

United Legislature Party te hi Lawngtlai West MLA Pu C.Ngunlianchnunga leh State Sorkar hmasa a Deputy Speaker Pu H.Biakzaua ten tawiwamin, LADC ah Sorkar piang mai theilo chu mipuiten an tawrh nasat vangin MNF leh Congress chuan mipui

tawrhna thleng zel tur ngai ngam lovin sorkar siam dun an remti tih Lawngtlaia Akashvani corr an hrilh a ni.

Lai Autonomous District-ah MNF Legislature Party sorkar, Pu V. Zirsanga kaihhruai chuan thlawptu a ngah tawk lo tiin Lairam Democratic Alliance invuah MDC 13 ten Governor hnenah an thlen hnuah kumin March 7 khan Governor chuan LADC ah CEM nilaiin thlawptu a neih dan fiah turin Floor Test nei turin a ti a. Hemi ni vekah hian LADC Session tan hma deuhvin CEM nilai Pu V. Zirsanga chuan CEM atanga banna a thehlut a ni.

Hemi hnu hian LADC ah sorkarna siamthei an awm mai loh avangin Governor chuan LADC thuneihna laksakin enkawl lailawk turin Lawngtlaia DC chu March ni 15 khan a ruat a. Caretaker in thla khat leh a chanve a enkawl hnuah vawiin chawhma lam khan INC MDC 1 leh MNF MDC 12 te chuan LADC ah INC Member Pu C.Lalmuanthanga kaihhruaina hnuaiyah sorkarna an siam theih thu hi an thlen ta a ni.

<><><>

ILLEGAL ARECANUT

Tukin khan Bilkhawthlir Kuhva chingtu pawl leh North Chhimluang Branch YMA leh Village Council – te tangkawp duty chuan dan lova phurh kuhva rah bag 130 an man.

Kuhva rah man te hi Phaisen leh North Chhimluang inkar link road ah an man a, dan loa Myanmar atanga kuhva lakluh ni ngeia hriat a ni a, motor pasarih atangin bag 130 an man a, heng kuhva rah man te hi a hmunah an tiral nghal a ni.

<><><>

SAVE THE RIPARIAN

Save the Riparian chuan a thawhnhniha chu vawiin khan Aizawl Khatlaa Lalmalsawma Memorial School bul atangin luikawr thenfai hna an thawk tan leh a. He project phase – II hi ni 30 chhunga zawh an inbeisei thu an sawi.

Save the Riparian Phase – II hna thawk tur te hi PHE Department-a PMU Project Management Unit Director Pu Lalduhkima chuan vailiam a. Khatla Local Council, YMA te bakah Tourism leh PHE department thawktute an tel a. Khatla YMA President chuan Save the Riparian hmalakna chu fakawm a tih thu sawiin, a theih ang anga puih an inhuam thu a sawi a ni.

Save the Riparian hian March ni 26 atanga April ni 20 chhung khan 20 Days Project kalpuin, ni 20 chhung hian Model Veng leh Mission Vengthlang inrina Sakhisih lui, a vaiin km 2.3 a thui tihfai hna an thawk a, he lui hian Tlawng lui a fin a ni. He an hmalakna hi Project Management Unit (PMU), Public Health Engineering Department (PHED), Aizawl Municipal Corporation (AMC) leh Urban Development & Poverty Alleviation (UD&PA) bultum a ni.

Save the Riparian Secretary Pu Lalmuansanga chuan an project hian mipuite thilungah thusawiin faina kawnga hmala duh mi tamtak an penchhuak a ni a ti a, Sakhisih luidunga bawlhhlawh tling te thenfai a nih hian mipui tui in tur thianghlimna leh luidunga ecological balance siam?hat kawngah nasat takin kawngro a su a ni, a ti a. Ni 30 chhung project an kalpui turah pawh hian mipui te thlawpna a ngen thu a sawi.

<><><>

LS POLL

Lok Sabha inthlan thawh thumna atana campaign chu vawiin tlai khan a tawp a, Zirtawpniah vote thlak a ni ang. Vawiin campaign theih ni hnukung berah Political party tin a tawp nan theihtawp an chhuah a. Congress hruaitu Priyanka Gandhi chuan vawiin khan Dhubri Lok Sabha Constituency ah hun a hmang a. Thusawiin Priyanka Gandhi chuan kum 10 chhungin rampumah hna nei lo zat an tam ber lai a thleng a. Kum 45 hnuah hna nei lo zat a san lai ber niin mi vaibelchhe 70 chuangin hna thawh tur an nei lo a ti a. Hetihlai hian sawrkar hna erawh post ruak nuai 20 chuang a awm thung a ni a ti. Assam Chief Minister leh BJP leader Himanta Biswa Sarma leh Asom Gana Parishad President Atul Bora te chuan NDA candidate tan an campaign bawk.

Prime Minister leh BJP senior leader Narendra Modia chuan vawiin khan Gujarat-a Banaskantha leh Sabarkantha district ah hun a hmang a. Karnataka ah Congress President Mallikarjun Kharge chuan Raichur leh Kalaburgi ah thu a sawi a, Congress hruaitu tho Rahul Gandhi pawhin naktukah Raichur leh Shivamogga ah te hun a hmang ang.

Samajwadi Party hotupa Akhilesh Yadav chuan vawiin khan Uttar Pradesh-a Etawah district-a Jaswant Nagar ah thu sawiin BJP chuan an sawrkar leh anih chuan ram danpui constitution thlak danglam an tum niin a puh a ni.

Inthlan thawh thumnaah hian State 10 leh UT pakhata huamchhunga parliament seat 93 ah inthlan a ni ang.

<><><>

ISRAEL

Israel Prime Minister Benjamin Netanyahu chuan Hamas nen inremna zawnga inbiak ni mahse Gaza chhim lama Rafah khawpui chu an run dawn tho tih a sawi. Israel-in Rafah-a an thil tum an tihhlawhtlin vek hma chuan an indo chhunzawm dawn niin Israel Prime Minister Netanyahu chuan a sawi a ni.

Hetihlai hian Israel leh Hamas te inkara inkahhai puang a, mi tangte chhuah an nih theih nan inbiak mek a ni a. Heti chung hian Pu Netanyahu chuan inremna a awm emaw awm lo emaw pawh nise Rafah an run tho dawn a ti a. US pawhin Rafah-a civil mi awmte chu inralring turin a lo hriattir tawh a.

Hetihlai hain West bank-a inkuhl Palestinian President Mahmoud Abbas chuan Rafah chu run anih chuan Palestinian mipuite chanchin indona rapthlak ber a thleng dawn an ti a. US President Joe Bidena chuan Rafah run tur hi a hlauhawm hle niin a sawi a. UN Secretary-General Antonio Guterres pawhin Rafah beih anih chuan inhuatna a sang chho zel ang a ti a. Indona pumpelh turin a ngen a ni.

<><><>